

# Vizyon

## STC i bat latet Seselwa

**D**onn ek lanmen drwat, pran ek lanmen gos. Se sa meyer fason pou dekri sa ki STC pe fer avek lepep Seselwa ozordi. Dimoun in vreman dezapwente avek lanons ki'n fer sa semenn lo nouvo pri bann komodite esansyel ki STC i fer vini. Apre ki Mr. James Michel ti dir ki rroupi in stabilize, rezerv in ogmante e ki Sesel pe zwenn tou bann target ki IMF ti'n mete, dimoun ti kwar ki sa ti ava ganny reflekte dan bann nouvo pri marsandiz. Me malerezman sa i pa leka. Pri komodite pli enportan in ogmante e Seselwa i kontinyen soufer.

### Pri diri i ogmante

Tou Seselwa i manz diri. Pri sa komodite in desann lo marse enternasyonal. Malgre sa, nou war ki STC in ogmant sa komodite ankor enn fwa. In annan en logmantasyon ant R1 ziska R2.80 par kilo lo sa komodite. Sa i vedit par egzamp ki en fanmiy ki aste 10 kilo diri i bezwen trouv R28 anplis zis lo diri! Sa i vreman tro bokou pour nou bann fanmiy ordiner. SNP ti mazinnen ki omwen gouvrenman atraver STC tya pran konsiderasyon pour tou fanmiy Seselwa e asire ki pri sa komodite esansyel i reste parey, oubyen menm redwir. Me Jj pa enterese avek sa. I dir fer monte tou keksoz.

### Lafarin osi in monte

Logmantasyon dan lafarin pou osi afekte nou dimoun plis. Sa i fer nou poz keston lo parol SPPF letan zot dir ki zot enterese avek sa ki pli vilnerab. Eski zot realize ki avek logmanasyon dan pri lafarin, sa pou annan en reperkison direk lo pri dipen? Pa oublie ki tou dimoun i manz dipen. Ozordi sa komodite i vreman ser, e avek en lot logmantasyon dan pri lafarin, malere pou soufer plis ankor. Sa pa akseptab e in ler pour sa bann dimoun ki pran sa bann desizyon pour zot reflasi plis lo ki mannyer zot pe afekte sa pep e fer dimoun vreman soufer. Eski Mr. Michel pa enterese avek sa bann dimoun ordiner e malere ki'n met li dan sa sez anler State House? Eski ozordi i enterese zis avek Arab ek etranze?

### Pti Trezor i soufer plis ankor

En lot lendikasyon ki vreman sa gouvrenman pa enterese avek sa ki pli vilnerab se letan nou regard logmantasyon dan dile pti

baba. En pti baba, oubyen nou pti trezor parey zot ti dir i bezwen dile pour li viv. I napa en lot swa. Me ki nou war? Olye protez sa bann pti mizerab, SPPF atraver STC i anvoy full kilo lo zot. Dile Nan in ogmante sorti R47 pou vin R62.50, e kommsi sa pa ti ase, la apreman in mont par R7.10 pou vin R69.50 en bwat 400g. Sa i vreman pa akseptab e nou demande ki STC i regard ankor dan pri sa komodite e fer en rediksyon.

### Jj in perdi direksyon

I kler pour tou Seselwa ki Jj in fini perdi direksyon. I koz lo en keksoz, me aksyon i al dan lot direksyon. Ozordi Seselwa pe soufer en kantite e lavenir i vreman dan sonm. Seselwa, nou bezwen en sanzman gouvrenman dan nou pei. SNP i sa vre lespwar pour Sesel. Regard byen sa ki pe arive otour ou e fer en bon swa lot fwa.

<u>Komodite</u>	<u>Pri Avan</u>	<u>Nouvo Pri</u>
<b>Nan 400gm</b>	<b>R62.40</b>	<b>R69.50</b>
<b>Long Grain Rice</b>	<b>R8 kilo</b>	<b>R9 Kilo</b>
<b>Regular Basmati</b>	<b>R16.20kilo</b>	<b>R19 kilo</b>
<b>Premium Basmati</b>	<b>R128.75 -5 kilo</b>	<b>R159 - 5 kilo</b>
<b>Flour</b>	<b>R12.50 kilo</b>	<b>R14.50 kilo</b>
<b>Potatoes</b>	<b>R11 kilo</b>	<b>R11.75</b>
<b>Onions</b>	<b>R11 kilo</b>	<b>R11.75 kilo</b>

# Eski ou krwar ki Jj i Kosto, Kapab e Konpetan?

# Ki kalite linite James Michel i oule? Propagann Jj lo SBC

**P**rezidan Michel in deklar tenm 2009 koman "Koste Seselwa." Me ki kantite senserite i annan dan sa parol? Si i senser i merit pran desizyon e aret selebre 5 Zen koman en lafet nasyonnal.

I merit fer sa sirtou sa lannen la ki i pe demann lepep Seselwa pou koste. Sa dat i ankor diviz nou nasyon, akoz i rapel nou ler ki nou demokrasie ti ganny vyole, moman ki nou premye Prezidan ki ti ganny swazir demokratikman ti ganny ranverse e kan plizyer Seselwa inosan ti ganny touye e en kantite al viv ann ekzil. Si Mr. Michel i senser fodre i abadonn sa dat ki kontinyen anmenn divizyon dan nou sosyete. I merit donn lenportans lanniverser nou

lendependans, koman sa zour kot tou Seselwa i devret ralye e koste ansanm dan sa vre lespri patriotik.

*Koste Seselwa* i osi vedir donn sans tou Seselwa ki anvi travay pour son pei loportinite fer li. Fodre ki Mr. Michel i termin sa pratik viktimizasyon politik, sirtou atraver sistenn security clearance letan dimoun pe rod travay. Fodre i demann biro ladministrasyon distrik pou ed tou Seselwa parey dan kominote. Koste Seselwa pa kapab zis la komela letan nou pei i dan difikilte ekonomik, zis apre pou zot dir 'kile lopoziyon les Jj travay' dan kanpanny eleksyon. Lepep pe obzerv byen pou war ki kalite lakol ou anvi fer nou koste avek. Nou fatige avek zis parol: Seselwa i oule aksyon aprezan.

**A**vek sitiasyon ekonomik kot tou dimoun pe mars lo labrez, Prezidan Michel nepli kapab mars dan distrik. Alor i oblize servi SBC pou fer son propagann. Ankor enn fwa nou vwar Antoine Onezime pe ganny servi zis pou demann bann 'leading questions' pou donn Prezidan Michel satisfaksyon dir sa ki li i anvi dir avek lepep.

Pourtan Msye Onezime ti etidye Lostrali li! Koumsa ki zot ti montre li fer travay en zournalis? Seselwa ouver nou lize e fer byen distenksyon ant laverite avek propagann.

Prezidan Michel i dir lakan-

tite deviz dan reserv Labank Santral pe ogmante, me i pa dir ki Seselwa nepli annan larzan pou aste deviz. I dir ketsoz pe stabilize, me i pa dir ki pri komodite in ogmante.

Nou'n deza antann bann tel programn propagann parey 'tete a tete' lo radyo, letan msye Michel ti ankor Vis-Prezidan. La i vin avek en lot, zis pou li komans son kanpanny avan en lot eleksyon.

SBC pa kapab reste en zouti propagann zis pour SPPF. In ler pour sa sanze. Nou espere ki Mr. Rose avek son 'pake leksperyans zournalis' ya sanz sa dezekilib ki ekziste ozordi.

## SPPF i anbadonn travayer

**A**n Novanm 2008, gouv-ernman ti anons pro-gramm depar volonter. En leskiz zot ti servi se ki sekter prive pe agrandi e zot bezwen sa bann dimoun.

Sa ti en mansonz pou apez lakoler piblik, lefe ki SPPF ti pe fer ekzakteman sa ki zot ti dir SNP ti pou fer si nou ti ganny eleksyon, savedir, pous dimoun dan zot travay.

Me parmi sa pros 4 mil dimoun ki'n perdi zot bouse manze, konbyen ki'n ganny en lot louvraz? Ki kantite dan sa 8 mil travayer etranze k'in ganny ranplase?

SPPF in trai konfyans lepep

Seselwa. E la avek sa sitiasyon ekonomik ki zot in met nou ladan, sa bann ansyen travayer e osi bann zenn ki fek fini lekol i annan difikilte ganny travay akoz dan sekter prive osi keksoz pa pe al byen.

SNP i solider avek tou travayer ki dan dezespwar gras a move planifikasyon ek fo promes SPPF. Plan en gouvrenman SNP a lavenir se pou kree en lekonomi modern, ki stab e ki fer progre. En tel mezir pou redres nou lekonomi e anmenn prosperite avek nouvo loportinite pour tou Seselwa. Lavenir i avek SNP.

## Oli pilot Seselwa?

**L**epep Seselwa in soke pou war ki nou lafors defans apre 30an lekzistans i ankor bezwen en etranze pou pilot son avyon. Ketsyon ki bokou pe demande se oli sa kantite zenn Seselwa ki SPPF in sipoze kree loportinite pour zot?

Eski seryezman napa zenn Seselwa ki kapab fer sa travay pilot? Oubyen eski sa pa montre nou ki SPPF i touzour met etranze avan Seselwa? Dir nou ki lapey sa etranze?

Lazenes Seselwa, i kler ki SPPF i zis dir zot 'Be what you want to be'. Me selman letan ou anvi vin en pilot Seselwa dan lafors defans, se etranze ki ganny swazir. Sanmenm sa bon lavenir ki Jj pe promet nou bann zenn?

## Respekte bann Carers silvouple

**I**n ler pou gouvrenman laret zwe avek bann 'carers'. Sa bann madanm byen devoue ki rann en gran servis nou bann dimoun aze nepli konnen kote zot debout. Zot pa konnen kan zot pou perdi zot travay e ki pou arive avek zot.

Dan SNP nou senpleman demann respe pour bann 'carers' e aret fer sa bann dimoun soufer. Nou espere ki bann konserne i ava pran sa an tet e zot ava fer keksoz kler avek tou 'carers'. Aret zwe avek dimoun.

## PAS PARTOU

### Shrek the Tourist Guide

Sitiasyon ekonomik i sitan grav ki Shrek komela i pas tou son letan dan carpark erport, pe esper en tyak avek bann touris Larisi pou li al fer gid. Letan zabitan Glacis pe rod li, Doc i dir i napa letan, i bezwen al debrouye. Lavi in dir mon frer, me selman zabitan i ankor pe rod sa lanmwatye lapey ki ou ti pou met dan distrikt pou ed zot avek. Ki deal?

### Mr. Michel i per lafrik

I kler pour tou Seselwa ki nou annan en prezidan ki per Lafrik. Si en konfer-

ans i fer Lerop oubyen dan en pei Arab, deswit i met son palto e ale. I menm pare pou lager seat First Class dan avyon. Me letan konferans i fer Lafrik, i anvoy Mr. Pat Pillay. La tou sef Afriken in zwenn dan some Linyon Afriken, me Mr. Michel in deside reste Sesel. Sad!

### 32an an aryer!

Le 5 Zen '77, Mr. René ek Mr. Michel ti met tou gard Angle dan avyon e pous zot parey lisyen. 32an plitar Mr. Michel ek Mr. René i ranpli lapolis avek bann sef lapolis sorti Irlann. Ki rol ki sa Komisyonner Seselwa pou annan? Sanmenm sa liberasyon?

## SNP Lottery

WIN WITH THE SNP!

### PRIZES

- 1st : Family holiday : Four return tickets to Mauritius + 7 days accommodation on BB
- 2nd : Two return tickets to Singapore
- 3rd : Two nights HB at La Reserve Hotel, Praslin
- 4th : Two nights BB at L'Archipel Hotel, Praslin
- 5th : SR5000 cash
- 6th : SR5000 cash
- 7th : One washing machine
- 8th : One refrigerator
- 9th : One TV set
- 10th : One DVD player
- 11th : One Guitar
- 12th-20th : Consolation prizes

R10/-

Draw on 1st May 2009

**SNP SEL LESPWAR POU SESEL**